

Di punta à l'abbissu

Donne di sole solu di lume site
E centu fole à e labbre fiurite
Lebbii i passi chì di fiamma muvite
Ghjocu di chjome à cunsumà e vite
Fate morgane è petre calamite

Donne di luna mele di luce tonda
Campu di stelle, eternu di a stonda
Cantate voi l'abbissi à a sponda
L'arregghju felice chè vo furate à l'ombra
Chì furlana à a furdana mannelli per a tomba

Da francà u sfracellu
Di l'ultimu vascellu

Fate ci un segnu
Date ci un sognu
Di piacè pienu
Di pace colmu
Eppo rebbia d'amore
A corsa di l'ore

Donne di l'onda di l'acque chete o sciolte
Mosse ritonde in l'ande dritte o torte
Memorie fonde di **spere** date è tolte
Rii giocondi fiamare à le volte
Temperè pregne è sumente sepolte

Donne di petra di punta à la pazzia
Torre arritte annantu à a batticcia
Ultimu **agrottu** chjostru è abbazia
Di pettu à l'oddiu chì oramai si piglia
I tempi novi d'amore in caristia

Paghjella

Ùn ci ai chè duì ghjorni
È dumane ti ne vai

Avanti di sulcà l'onde
Veni è toccami **una manu**

È s'ella ùn ti face pena
Ancu un basgiu pianu pianu